

Lwgndae Henj Lo

柿子黄了

□ Vangz Gijveiz / 黄启维

Byawz rox daengz dou ngamq-ngamq caeg aeu ndaej geij aen lwgndae henj, Baeuqsam mbouj rox seizlawz bae doengh guhhong dauq ranz lo, raen dou caeg aeu gij lwgndae de, doq ndaq naeuz: “Yoho, yienzlaiz dwg geij lwg byaiz sou na, dawz baez ndeu lo, haemhneix gou aeu lwnh hawj bohmei sou nyi cij ndaej, yaep dem hix bae hagdangz lwnh lauxsae sou nyi……” Baeuqsam doq maenj doq coh dou byaij gvaqdaeuj naeuz gaemh vunz, mbouj rox de dwg guh caen roxnaeuz guh gyaj. Dou geij lwg hujgeiq lau ndaej nyohu rih dangzvaq bae, naj bienq fangz liux, lwgndae hix mbouj gamj aeu lo, doq buetdeuz hwnj gwnz bya baihlaeng bae ndoj. Ngoenzhaenx banringz ndoj youq ndaw gamj gwnz bya mbouj gamj bae hagdangz, daengz haemh laep le hix mbouj gamj dauq ranz. Gvaqlaeng youq ndaw mbanj baez raen Baeuqsam dou couh lumj duznou raen meuz nei, caegcaeg buetdeuz liz de gyae’gyae bae. Gvaqlaeng, dou fatyienh moix bi daengz seizcou lwgndae yaek henj couh raen Baeuqsam ciengzciengz

naengh youq bakdou ranz yawj coh go mak lwgndae de luenghliengz, gij lwgndae de venj rim gwnz go, henjrwgrwg, dou caiq ngah ndaej myaiz rih roengzdaeuj hix mbouj gamj cimz lo.

Saedceij couh dwg yienghneix menhmenh gvaqbae, daengngoengz doek roengz cong, ronghndwen youh hwnjdaeuj, gij lwgndae Baeuqsam ciuqgaeuj bibi henj, gou caeuj gyoengq hujgeiq yied bi yied majhung, lizgyae mbanjranz okrog bae doegsaw, doeg gauhcungh, doeg daihhag, mbanj hix okrog bae ra gwn, youq baihrog cawx ranz cawx riengh youq lo, mbanj hix okbae youq danhvei miz hong guh. Roxnyinh ranzcoj hix liz dou yied nanz yied gyae lo, dou hix mbouj miz seizgan dauqbae yawj de, hix mbouj miz seizgan dauqbae yawj gij lwgndae Baeuqsam seizlawz henj dem lo.

Byaij haeuj mbanj yaek daengz henz ranz Baeuqsam lo, raq rumzcou he ci gvaqdaeuj, miz ngeu heiq homvan ndeu ci haeuj ndaeng gou daeuj, yi, gij homvan neix mbouj dwg

feihdauh lwgndae ma? Gou fwt singj gvaqdaeuj, ngiengx gyaeuj baez yawj, gwnz go makndae venj rim lwgndae aen lumj aen henjrwgrwg, ngaem gyaeuj yawj laj goek makndae loengq miz haujlai lwgndae, mizmbangj gaengq naeuh lo, cungj mbouj miz vunz daeuj gip ne.

Raen Baeuqsam boux vunz ndeu naengh youq bakdou ranz lumj ngeix maz nei. De hwet gungj vunz byom, naj reuq, byoem gyaeuj gaengq hau liux lo, gou byaij gvaqbae dongx de, de cam naeuz gou dwg byawz? Gou riu naeuz gou dwg boux neix boux neix, seiz lij iq ciengz daeuj caeg gij lwgndae mwngz bw, mbouj rox geiq la? De ngauzngauz gyaeuj.

Riengz Baeuqsam ganggoj, cij rox Buzsam senq gvaqseiq lo, haujlai bouxgeq hix gvaqseiq lo, dah lwg de haq bae giz dieg gyae gaengq haujlai nanz mbouj ndaej dauq ranz yawj de lo. Gangj daengz seiz doxdaug, Baeuqsam cam naeuz seizneix sou deuz gvaq gizlawz bae liux mbouj raen dauq ha? Gou naeuz Daeghenj youq Hozciz dang lauxbanj, Daeglingz youq



Guengjdoeng cawx ranz, gou youq yienhsingz guhhong……

Gangj le haujlai nanz, baedauq cungj dwg lwnh goj seizgonq. Doeklaeng, Baeuqsam danq gaemz heiq he naeuz: “Meh mwngz gai lwgsawz ni, seizgonq gou lau lwgnyez daeuj caeg, seizneix lwgndae henj venj rim gwnz go, henj le doek roengz lajgoek rim bae, muengh naeuz hawj geij lwg fangzbyaiz sou daeuj caeg, hoeng caiq hix mbouj raen sou daeuj caeg dem lo.”

Gou yawj coh rog mbanj gizgyae bae ngeixloengloeng, giuzndaeng roxnyinh miz di soemj, mbouj rox baenzlawz gangj.

(2 sat)

Daengngoengz Baihdoeng Mbouj Rox Doek

东升太阳永不落

——Cimh Riz Bak Bi Cungguck Gungcanjdangj

——追寻中国共产党百年足迹

□ Cingh Swmungz / 清似蒙

4. Diuz Neix Caen Dauhleix

Miz geijlai hauxseng,
Roengzrengz bae gyap loq,
Sanghai《Bouxcoz Moq》,
Yinx roenloh hawj vunz.

Saw《Sienghgyangh Bingzlun》,
Gejlwnh saeh gwnzbiengz,
Yienghyiengh cungj gangj bieng,
Vunz daeuj riengz daeuj cimh.

Raeuz miz rengz mbouj lau,
Rinbya ngauz ndaej lak,
Boux vunz hong cei q ak,
Mbwn lak dangq bengzve.

Ngozgoz lingh laeb guek,
Bouxhoj buek ndaej baenz,
Doxgap guh ndaej daengz,
Diuz neix caen dauhleix.

Buwjsizveizgwz,
Gauj gwzming cei q haeng,
Bouxdaeuz Lezningz maenh,
Daengx biengz haenh mbouj dingz.

Gyo Maj-Lez Cuji,
Lijlun ndaej yungz nae,
Bouxhoj yaek baenz ndei,
Caez doxgiet hwnjdaeuj.

5. Gungcanjdangj Laebbaenz

Gak dieg mbanj hauxseng,
Haengrengz ceng minzcuj,
Laeb gungcanj siueuj,
Mieng caux guh lingh biengz.

Gak lengq aen siueuj,
Lumj duj vadauz doeng,
Duj hau duj maeqhoengz,
Muengh ngoenz gyonj caez angj.

Ngoenzde ndaej daeuj daengz,
Daengngoengz hwnj hoengzoq,
Sanghai Muenghceiqlo (vangcilu),
Aen hoih moq hai baenz.

Ngoenzde ndaej daeuj laeuh,
Fagfouj caeuj fagliemz,
Gwnz ruznding giet yienz,

Haeuj biengz gaj diendeih.

Yaek hag yiengh Suhlenz,
Lienzhab gyoengq bouxhoj,
Naemj laeb aen guek moq,
Hawj bouxhoj miz gwn.

Bi 1921,
Mbwn roh ndit daengngoengz,
Dangj yeix ok diuzroen,
Raeuz gvej oen baenaj.

Yawj dwg lwg gyoqfeiz,
Beiz rumz rox dawz haengq,
Caih vunz saengq mbouj saengq,
Feiz haengq ndaej coemh ndoeng.

Boux souh hoj souh nanh,
Doxcanj daeuj gaenriengz,
Dangq diemj feiz coemh fiengz,
Raih dawz lienz baenz benq.

Gungcanjdangj laebbaenz,
Vunzlai raen maqmuengh,
Ninzloq hix caemh siengj,

Gwndaenj bienq baenz ndei.

Cungguck Gungcanjdangj,
Cix dangq aen daengngoengz,
Venj gyangmbwn baihdoeng,
Ciuq rongh roen rongh loh.

Ngeih Fwnrumz Geujhumhum

1. Ndaej Mbouj Ndaej Byaij Bae

Ndaej mbouj ndaej byaij bae,
Miz manaez miz guk,
Lwgnyez ngamq ok mbuk,
Raen guk mbouj rox lau.

Naj roen gyae’gyanggyang,
Miz yiengh dangj yiengh gaz,
Deng hamj dah bin bya,
Deng viq nya dangh raemx.

Viq nya cix viq nya,
Daihgya mbouj lau hoj,
Diegdeih mbouj miz loh,
Byaij lai goj baenz roen.

(2)